

京東考古錄

(說鈴之一)

顧炎武著

中華書局

京東考古錄

叢書集成初編所選學海類編
及龍威秘書皆收有此書山東
考古錄已取龍威本故此書亦
據龍威本排印

京東考古錄

考薊

清 崑山顧炎武寧人著

漢書薊古燕國召公所封。後漢書薊本燕國刺史治。自七國時燕都于此。項羽立臧荼爲燕王。都薊。高帝因之爲燕國。元鳳元年燕刺王旦自殺。國除爲廣陽郡。本始元年爲廣陽國。建武十三年省屬上國。永平八年一作永元復爲廣陽郡。晉復爲燕國。魏爲燕郡。隋開皇初廢。大業初置涿郡。唐天寶元年更名范陽郡。並治薊。水經注濕水過廣陽縣北。又東至漁陽雍奴縣。註今城內西北隅有薊邱。因邱以名邑也。後漢書彭寵傳寵反漁陽。自將二萬餘人攻朱浮于薊。晉書紀載魏圍燕中山。清河王會自龍城遣兵赴救。建武將軍餘崇爲前鋒。至漁陽。遇魏千餘騎。鼓噪直進。殺十餘人。魏騎遁去。崇亦引還。會乃上道徐進。始達薊城。卽此三事。可見薊在漁陽之西。唐書地理志幽州范陽郡治薊。開元十八年析置薊州。漁陽郡治漁陽。及遼改薊爲析津縣。因此薊之名遂沒于此。而存于彼。今人乃以漁陽爲薊。而忘其本矣。史記樂毅書薊邱之植。植于汶篁。一統志云城西北隅卽古薊門。舊有樓館並廢。但門外存二土阜。旁多林木。頗爲近之。禮記樂記武王克殷反商。未及下車而封黃帝之後於薊。水經注。誤。疏云。今涿郡薊縣是也。卽燕國之都。孔安國司馬遷及鄭皆云燕祖召公。與周同姓。案黃帝姓姬。召蓋其後也。而皇甫謐以召公爲文王之庶

子考之史傳更無所出。又左傳富辰之言亦無燕也。案先儒之說以薊與燕國爲一。史記燕世家武王滅紂封召公于北燕。索隱曰北燕今在幽州薊縣故城。蓋一地不容封二國。故疑召公卽黃帝之後。其不曰燕而曰薊者。有南北二燕。故稱其國都以明之也。

補註漢書二燕傳

漢書燕王定國傳殺肥如令郢人。案地理志肥如自屬遼西郡。不屬燕。武帝本紀元朔元年秋匈奴入遼西殺太守諸侯王表言武帝下推恩之令而藩國自析長沙燕雖有舊名皆亡南北邊矣。然則肥如令之殺于燕必在元朔以前。未析邊郡之時也。燕王旦傳發民會圍大獵文安縣以講士馬。其上云武帝時且坐臧亡命削良鄉安次文安三縣。是文安已削不屬燕。又云昭帝立大將軍霍光秉政褒賜燕王錢三千萬益封萬三千戶。昭帝本紀亦云始元元年益封燕王廣陵王及鄆邑長公主各萬三千戶。然則文安縣之仍屬于燕又在益封萬三千戶之後也。此皆史文之互見者可以參考而得之也。

考金陵

一統志金太祖陵世宗陵俱在房山縣西二十里三山峯下。宣宗陵章宗陵俱在房山縣西大房山東北。案金史海陵紀貞元三年三月乙卯命以大房山雲峯寺爲山陵建行宮其麓。五月乙卯命判大宗正事京等如上京奉遷太祖太宗梓宮十一月乙巳朔梓宮發不承殿戊申山陵禮成正隆九年七月己酉命太保昂如上京奉遷始祖以下梓宮八月丁丑如大房山行視山陵十月乙酉葬始祖以下十帝于大房

山。閏月己亥朔。山陵禮成。又太祖紀。太祖葬睿陵。太宗紀。太宗葬恭陵。世宗紀。世宗葬興陵。章宗紀。章宗葬道陵。又熙宗紀。帝被弑。葬于皇后裴滿氏墓中。貞元三年。改葬于大房山。藜香甸。諸王同兆域。大定初。追上諡號。陵曰思陵。二十八年。改葬于蛾眉谷。仍號思陵。又海陵紀。葬于大房山。鹿門谷。後降爲庶人。改葬于山陵。西南四十里。又睿宗紀。大定二年。改葬于大房山。號景陵。顯宗紀。大定二十五年十一月庚寅。葬于大房山。章宗卽位。號曰裕陵。是則金代之陵。自上京而遷者十二帝。其陵曰光。曰熙。曰建。曰輝。曰安。曰定。曰永。曰泰。曰獻。曰喬。曰容。曰恭。其崩于中都而葬者二帝。其陵曰興。曰道。被弑者一帝。其陵曰思。追諡者二帝。其陵曰景。曰裕。被弑而降爲庶人者一帝。葬在兆域之外。而宣宗則卽位之二年。遷于南京。三年五月。中都爲蒙古所陷。葬在大梁。非房山矣。今一統志止有四陵。而誤列宣宗。又躋于章宗之上。諸臣不學之甚也。

辨一統志遼陵之誤

一統志遼章宗陵。在三河縣五十五里。考遼無章宗。其一代諸帝。亦無葬三河者。

辨一統志密雲之誤

一統志引古事舛戾最多。未有若密雲之可笑者。晉書石季龍紀。載段遼棄令支。奔密雲山。遣使詐降。季龍使征東將軍麻秋迎之。遼又遣使降于慕容皝。曰。胡貪而無謀。吾今請降求迎。彼不疑也。若伏重兵以邀之。可以得志。皝遣子恪伏兵于密雲。麻秋統衆三萬迎遼。爲恪所襲。死者十六七。秋步遁而歸。是段遼

與燕合謀而敗趙之兵也。今一統志云：密雲山在密雲縣南一十五里，亦名橫石，昔燕趙伏兵于此，大獲遼衆，是反以爲趙與燕謀而敗遼之衆，又不言段而言遼，似以遼爲國名，豈脩志諸臣并晉書而未之見乎。

考臨朐縣

一統志：三河在漢臨朐縣地。今考二漢書並無臨朐縣。唐書地理志：幽州范陽郡潞縣，下云武德二年置臨朐縣。貞觀元年省臨朐，而薊州漁陽郡三河，下云開元四年析潞縣置，故知本是一地，先分爲臨朐，後分爲三河，皆自唐非漢也。

考夏謙澤

晉書紀載慕容寶盡徙薊中府庫北趨龍城，魏石河頭引兵追及之于夏謙澤。胡三省通鑑注：夏謙澤在薊北二百餘里，恐非。案水經注：鮑邱水東南流，逕潞城南，又東南入夏澤。澤南紆曲，渚一十餘里，北佩謙澤，眇望無限也。下云：鮑邱水又東與朐河合。三河志：鮑邱河在縣西二十五里，源自口外，源流經九莊嶺，過密雲合。

人溪至通州之米莊村，合沽水入朐河。今三河縣西三十里，地名夏店，舊有驛。鮑邱水逕其下，而洶河自縣城南至寶坻，下入于海，疑夏店之名，因古夏澤東望皆陂澤，與經注正合。自薊至龍城，此其孔道，寶以丙辰行，魏人以戊午及之，相距二日，適當其地也。

辨石門

後漢書公孫瓚傳中平中張純與烏桓邱力居等入寇瓚追擊戰于屬國石門大敗之註石門山在今營州柳城縣西南而水經注云灋水又東南逕石門峽山高嶄絕壁立洞開俗謂之石門口漢中平五年公孫瓚討張純戰于石門大破之今薊州東北六十里石門驛卽水經注之石門是也案史本紀但言石門而傳言屬國石門明有兩石門水經注所指乃漁陽之石門非遼東屬國之石門當以柳城爲是通典柳城在石門山

辨一統志楊令公祠之誤

一統志楊令公祠在密雲縣古北口祀宋楊業案楊業傳業本太原降將太宗以業老于邊事遷代州兼三交駐泊兵馬都部署會契丹入雁門業領麾下數千騎自西京而出由小徑至雁門北口南嚮背擊之契丹大敗以功遷雲州觀察使雍熙三年大兵北征以忠武軍節度使潘美爲雲應路都部署命業副之以西上閣門使蔚州刺史王侁軍器庫使順州團練使劉文裕護其軍諸軍連拔雲應寰朔四州師次桑乾河會曹彬之師不利諸路班師美等歸代州未幾詔遷四州之民于內地令美等以所部兵護之時契丹復陷寰州侁令業趨雁門北川業以爲必敗不可侁逼之行業指陳家谷口曰諸君子此張步弓強弩爲左右翼以援美與侁領麾下兵陳于谷口自寅至巳侁使人登托邏臺望之以爲契丹敗走欲爭其功卽領兵離谷口美不能制乃緣交河西南行二十里俄聞業敗卽麾兵卻走業力戰至谷口望見無人卽

拊膺大慟。再率帳下士力戰。身被數十創。士卒殆盡。業猶手刃數十人。馬重傷不能進。爲契丹所擒。不食三日死。是業生平未嘗至燕。況古北口又在燕東北二百餘里。地屬契丹久矣。業安得而至此。且史明言雁門之北口。而以爲密雲之古北口。是作志者東西尙不辨。何論史傳哉。又按遼史。聖宗紀統和四年七月丙子。樞密使斜軫奏復朔州。擒宋將楊繼業。耶律斜軫傳。繼業敗走至狼牙村。衆軍皆潰。繼業爲飛矢所中。被擒。與宋史略同。密雲縣志威靈廟在古北口北門外一里。祀宋贈太尉大同軍節度使楊公。成化十八年。禮部尙書周洪範記引宋史全文。而不辨雁門北口之非其地。豐潤縣志令公村在縣西十五里。宋楊業屯兵拒遼于此有功。故名。並承一統志而誤。

考盧師山

仁宗實錄。洪熙元年二月乙卯。封大青龍神爲宏濟大青龍神。小青龍神爲靈顯小青龍神。賜名所居山爲翠微山。遣成國公朱勇諭祭。仍命禮部歲以春秋仲月。遣順天府官致祭。蓋京師平則門外三十里盧師山有潭。世傳有大小二青龍。出沒不時。遇旱致禱。輒雨。及是夏不雨。遂卽其山禱焉。雨隨注。故有是命。大明一統志。盧師山在府城西三十里。隋沙門盧師馴伏青龍之所。今考元史呂思誠傳云。爲景州蓇縣尹。天旱。道士持青蛇曰。盧師谷小青。謂蛇也。禱之。卽雨。思誠以其惑人。殺蛇逐道士。雨亦隨至。遂有年。則是元時已有此說。又考唐書常挺傳云。挺遣燕州司馬王安德行渠。作漕。舩運糧。自桑乾水抵盧思。行百里。渠塞不可通。挺以方苦寒。未可進。遂下米臺側。厝之。待水泮乃運。則盧師或盧思之誤。

辨遼史引公孫度平州之誤

晉書平州禹貢冀州之域。於周爲幽州界。漢屬右北平郡。後漢末公孫度自號平州牧。及其子康。康子淵並據遼東。魏分遼東昌黎玄菟帶方樂浪五郡爲平州。後還合爲幽州。咸寧二年十月分昌黎遼東玄菟帶方樂浪等郡國五置平州治昌黎。是則公孫度之平州乃遼東而咸寧所置之平州乃柳城卽昌黎也。魏書營州領郡六其一曰昌黎。晉分遼東置領縣三其一曰龍城太平眞君八年併柳城昌黎棘城屬焉。有堯祠榆頓城狼水。隋書遼西郡統縣一柳城本魏龍城縣開皇元年改爲龍山縣十八年改爲柳城縣。而平州之名則自魏更立于遼西。魏書平州領郡二其一曰遼西領縣三其一曰肥如。獨其于平州之下注云晉置治肥如城未甚詳明。其曰晉置者謂平州之名始立于晉也。其曰治肥如城者謂魏之平州治肥如也。上下本不相蒙。且如遼西郡下注云秦置亦謂遼西之名立于秦也。豈可以秦之遼西亦治肥如乎。以此例之可見矣。隋唐二書並未有誤。至遼史于平州遼興軍下云漢末公孫度所有傳子康孫淵是誤以拓拔氏之平州爲公孫度之平州矣。澤州下亦云不知其時皆曹氏所有也。

正後漢志誤字

後漢志遼東屬國下云昌遼故天遼屬遼西考之前代史書並無昌遼之名。而前漢亦無天遼疑當作昌黎。故交黎屬遼西以漢書證之。遼西郡交黎下云東部都尉治應劭曰今昌黎又胡三省通鑑注云昌黎今交黎縣屬遼西郡。後漢屬遼東屬國都尉。此後人寫刻之誤可以意改者也。

辨柳城

史言慕容皝以柳城之北龍山之西福德之地乃營立宗廟宮闕命曰龍城一統志柳城在永平府西二十里龍山在府西四十里永平府舊志柳城在昌黎縣西南六十里漢末爲烏桓所據曹操滅之歷魏晉爲慕容氏父子所據隋置縣屬遼西郡唐置營州元省入昌黎爲靜安社二說不同今府西二十里全無遺跡而靜安社則嘉靖三十一年立爲堡然皆非柳城之舊也案唐書營州柳城郡下云城西北四百八十里有渝關守浞城又云西北接奚北接契丹通典營州柳城郡下云東至遼河四百八十里南至海二百六十里西至北平郡七百里北至契丹界五十里東南到安東府二百七十里西南到北平七百里西北至契丹界七十里東北到契丹界九十里而平州北平郡下云東至柳城郡七百里西至漁陽郡三百里東北到柳城郡七百里是柳城在今永平之東北七百里而慕容氏之龍城昌黎及魏以後之營州並在其地唐萬歲通天元年爲契丹所陷聖歷二年僑治漁陽開元五年又還治柳城而今之昌黎乃昔之廣寧縣大定二十九年改爲昌黎名同而地異也

三國志魏武用田疇言上徐無山塹山堙谷五百餘里經白檀歷平岡涉鮮卑庭東至柳城徐無山在今玉田則柳城在玉田之東北數百里也北齊書顯祖伐契丹以十月丁酉至平州從西道趨長塹辛丑至白狼城壬寅至昌黎城是昌黎在平州之東北齊主之行急猶五日而後至也隋書漢王諒伐高麗軍出臨渝關至柳城唐書太宗伐高麗還以十月丙午次營州詔遼東戰亡士卒骸骨並集柳城東南命有司

設太牢。上自作文以祭之。丙辰，皇太子迎謁于臨潑關。在今撫寧之東。則柳城又在其東。太宗之行遲，故十日而後至也。

遼史載柳城曰：與中府古孤竹國。漢柳城縣地。慕容皝以柳城之北，龍城之南，福德之地，乃築龍城，構宮廟，改柳城爲柳城縣，而遷都之。號曰和龍宮。慕容垂復居焉。重郡，其子寶始遷龍城也。後爲馮跋所滅。高雲滅慕容氏，馮跋伐高雲容氏也。魏取之爲遼西郡。隋平高寶寧，置營州。煬帝改柳州郡。唐武德初，改營州總管府，尋爲都督府。

萬歲通天元年，陷李萬榮。神龍初，徙府幽州。開元四年，復治柳城。八年，徙漁陽。十年，還柳城。後爲奚所據。太祖平奚，及俘燕氏，將建城，命韓知方擇其處，乃完葺柳城，號霸州。彰武節度使重熙十年，升興中府。有大華山、小華山、香高山、麝香崖。天授皇帝刻石在焉。駐龍峪神射泉、小龍河。統州二縣，四其一曰興中縣。本漢柳城縣地。太祖掠漢民居此，置霸城縣。重熙中，置府更名。此文述柳城之故，頗爲詳備。元世祖至元七年十月己丑，降興中府爲州，以地圖按之。當在今前屯衛之北。但唐書平州下云：又有柳城軍。永泰元年，置蓋唐時柳城之地，屢被陷沒，移遷無常。此其在平州者，或卽今之靜安社，未可知。然不可以永泰元年之柳城爲古之柳城也。

一統志采輯諸書，不出一人之手。如柳城廢縣，旣云在府城西二十里矣，而于土產則曰人參、麝香、豹尾。俱廢柳城縣出。今府西二十里，乃灤河之西、洞山之南、沙土之地，其能出此三物乎？案唐書營州柳城郡貢人蔘、麝香、豹尾、皮骨，雖志本引之，而不知府西二十里之誤也。

考昌黎

案昌黎有五。漢書遼西郡之縣。其八曰昌黎。渝水首受塞外。南入海。東部都尉治。應劭曰。今昌黎。通鑑注。昌黎。漢交黎縣。屬遼西郡。後漢屬遼東。屬國都尉。魏齊王正始五年。鮮卑內附。復置遼東屬國。立昌黎縣。以居之。後立昌黎郡。晉書武帝紀。太康二年。慕容廆寇昌黎。二年。安北將軍嚴詢敗慕容廆于昌黎。成帝咸康二年。慕容皝自昌黎東踐水而進。凡三百餘里。至歷林口。是則渝水下流而當海口。此一昌黎也。晉書紀載慕容皝徙昌黎郡。又云。破宇文歸之衆。徙其部人五萬餘落于昌黎。及慕容盛之世。有昌黎尹張順。劉忠。高雲以馮素弗爲昌黎尹。馮跋之世。有昌黎尹孫伯仁。以史考之。當去龍城不遠。此又一昌黎也。魏併柳城。昌黎棘城于龍城。而立昌黎爲郡。志云。有堯祠榆頓城狼水。而列傳如韓麒麟。韓秀。谷渾。孫紹之倫。皆昌黎人。卽燕之舊都龍城。此又一昌黎也。齊以後。昌黎之名廢。至唐太宗貞觀二年。更崇州爲北黎州。治營州之東北。廢陽師鎮。八年。復爲崇州。置昌黎縣。後淪于奚。遼史。建州永康縣。本唐昌黎縣地。此又一昌黎也。遼太祖以定州俘戶置營海軍。其縣一曰廣寧。金世宗大定二十九年。改爲昌黎。相沿以至今。在府城東南七十里。此又一昌黎也。郭造卿永平志。辨昌黎有二。而不知其有五。今序而列之。論古者可以無惑焉。

韓文公多自稱昌黎。唐書載韓氏世系。則云漢弓高侯頽當裔孫。世居潁川。徙安定。武安常山九門。而生安定桓王茂。爲公之六世祖。與昌黎之韓支派各別。故先儒以爲公之自稱。本其郡望。宋元豐七年。封公

爲昌黎伯。亦是取其本望。如韓擇木封昌黎伯。韓長鸞韓建封昌黎王之比。若昌黎之韓。最著于魏。如麒麟顯宗。史明言其爲昌黎棘城人。又非今日之昌黎也。然則文公之沒二百六十年。而始封昌黎伯。又一百六十年。而始立今之昌黎縣。以金之縣。而合宋之封。遂謂文公爲此縣之人。其亦未之考矣。

考石城

漢右北平郡之縣十六。其三曰石城。後漢無之。蓋光武所併省也。至燕分置石城郡。考之通鑑。及晉載紀。得二事。慕容寶宿廣都黃榆容。清河王會勒兵攻寶。寶師輕騎馳二百里。晡時至龍城。會遣騎追至石城。不及。是廣都去龍城二百里。而石城在其中間也。慕容熙敗于北原。石城令高和與尙方兵于後作亂。註云。高和本爲石城令。時以大喪會于龍城。是石城去龍城不遠也。魏書地形志。廣興下云。有雞鳴山。石城大柳城。此卽漢之石城矣。魏太平眞君八年。置建德郡。治白狼城。領縣三。其一曰石城。有白鹿山祠。其二曰廣都。水經注。石城川水出西南石城山。東流逕石城縣故城。南北屈逕白鹿山西。卽白狼山也。又東北入廣成縣東廣成。卽廣都城。燕之石城。在廣都之東北。而此在廣都之西南。是魏之石城。非燕之石城矣。隋書始無石城。云北齊廢之。而唐書平州石城下云。本臨渝。武德七年省。貞觀十五年置。萬歲通天二年。更名。有臨渝關。有大海。有碣石山。是武后所改名之石城。又非魏之石城矣。遼史。瀋州統縣三。其三曰石城。下云。唐貞觀中。于此置臨榆縣。萬歲通天元年。改石城縣。在瀋州南三十里。唐儀鳳石刻在焉。今縣又在其南五十里。遼徙置以就鹽官。是遼之石城。又非唐之石城矣。今之開平中屯衛。自永樂三年。徙于石

城廢焉。在灤州西九十里。乃遼之石城。而一統志以爲漢舊縣。何其謬與。

考宋史營平灤三州之誤

宋史言朝廷與金約。滅遼止求晉路。契丹故地。而不思營平灤三州。非晉路。乃劉仁恭獻契丹以求援者。旣而王黼悔欲併得之。遣趙良嗣往請之。再三金人不與。此史家之誤。案通鑑。初幽州北七百里有渝關。下有渝水。通海。自關東北循海有道。道狹處纔數尺。旁皆亂山。高峻不可越。北至進牛口。舊置八防禦軍。募土兵守之。田租皆供軍食。不入于薊。幽州歲致緡績。以供戰士衣。每歲早穫。清野堅壁。以待契丹。契丹至。輒閉壁不戰。俟其去。選驍勇據隘邀之。契丹常失利走。士兵皆自爲田園。力戰有功。則賜勳加賞。由是契丹不敢輕入寇。及周德威爲盧龍節度使。恃勇不修邊備。遂失渝關之險。契丹每芻牧于營平之間。又案遼史。太祖天贊二年春正月丙申。大元帥堯骨克平州。獲刺史趙思溫。裨將張崇。二月如平州。甲子以平州爲盧龍軍。置節度使。遼之天贊二。乃後唐莊宗同光元年。是營平二州。契丹自以兵力取之于唐。而不於劉仁恭。又非賂以求援也。若灤本平州之地。遼太祖以浮戶置灤州。當劉仁恭時。尙未有此州。尤爲無據。此亦史家千年未正之誤。遼史于灤州下云。石晉割地。在平州之境。亦誤也。

考契丹所得十六州

世言燕雲十六州。自石敬瑭以賂契丹。不屬中國者四百四十餘年。蓋不盡然。考之于史。晉高祖所割以裨契丹者。山前之州也。曰幽。今順天府。曰薊。今薊州。曰瀛。今河間府。曰莫。今任邱縣。曰涿。今涿州。曰檀。今密雲縣。曰順。今順

義縣
山後之州九曰新州今保安曰媯州今延慶曰儒縣今永寧曰武西境今在朔州曰雲府今大同曰應州今應曰寰縣今馬邑
曰朔州今朔曰蔚州今蔚而營平二州則後唐時契丹自以兵取之矣其後周世宗復關南北則瀛莫二州復歸中國而其餘十四州遂淪于契丹并所取營平二州亦適得十六之數若霸州乃周世宗所置灤州乃契丹所置又不在十六州之內者也

辨賓徒

漢書遼西郡賓徒縣莽曰勉武今本亦有作賓徒者後漢書遼東屬國賓徒故屬遼西通鑑晉趙王倫貶吳王宴爲賓徒縣王秦符堅封慕容垂爲賓徒侯並取此爲名晉書載記作賓都侯都之與徒以音相近而轉尤爲明證而遼史則云中京大定府長安縣本漢賓從縣地勸農縣本漢賓從縣地此承漢志傳寫之訛而未考後漢晉二書也

辨龍城

案史有兩龍城漢書匈奴傳匈奴諸王長少五月大會龍城祭其先天地鬼神武帝本紀元光五年車騎將軍青至龍城獲首虜七百級衛青傳作龍城註龍與龍同此一龍城也晉書載記慕容皝築城于柳城之北龍城之西立宗廟宮闕命曰龍城此又一龍城也六朝以下文人多用龍城隋煬帝與史祥書望龍城而衝寇盼狼居而發憤自此遞相祖襲皆匈奴傳之龍城耳

辨一統志朝鮮

漢書地理志、樂浪郡之縣二十五。其一曰朝鮮。應劭曰：故朝鮮國。武王封箕子于此。志曰：殷道衰，箕子去之朝鮮。在今高麗國境內。慕容氏于營州之境立朝鮮縣。魏又于平州之境立朝鮮縣。但取其名與漢縣相去則千有餘里。一統志乃曰：朝鮮城在永平府境內。箕子受封之城。當日儒臣令稍知古今者爲之何。至于此爲之太息。通鑑：朝鮮令孫沐非箕子朝鮮也。

辨三韓

今人謂遼東爲三韓。不知其何取。考晉書：韓種有三。一曰馬韓。二曰辰韓。三曰弁韓。辰韓在帶方南。東西以海爲限。馬韓居山海之間。無城郭。凡有小國五十六。大者萬戶。小者數千家。各有渠帥。又曰：辰韓在馬韓之東。自言秦之亡人避役入韓。韓割東界以居之。立城柵。言語有類秦人。由是或謂之秦韓。初有六國。後稍分爲十二。又有弁韓。亦十二國。合四五萬戶。各有渠帥。皆屬于辰韓。辰韓常用馬韓人作主。雖世世相承而不得自立。明其流移之人。故爲馬韓所制也。又載其習俗器用朝貢之詳甚具。遼史、高州三韓縣。辰韓爲扶餘。弁韓爲新羅。馬韓爲高麗。開泰中聖宗伐高麗俘三國之遺人置縣。据此則三韓並是東彝之國。種類各殊。而遼東乃漢晉時內地。烏得以三韓目之。近代文人用古而不求所出。其誤也久矣。

辨張公素

一統志：永平府名宦有唐張仲素。德宗時以列將事盧龍軍節度使張允仲。擢平州刺史。允仲卒。詔仲素代爲節度使。同平章事。考之唐書藩鎮列傳。則云張仲武爲盧龍節度使。破降回鶻。又破奚北部。及山奚。

累擢檢校司徒。同中書門下平章事。卒。子直方多不法。畏下變起。奔京師。軍中以張允仲總後務。張公素以列將事允仲。擢平州刺史。允仲卒。子簡會爲副大使。公素以兵來會喪。簡會出奔。詔以公素爲節度使。性暴厲。眸子多白。燕人號白眼相公。爲李茂勳所襲。奔京師。貶復州司戶參軍。案盧龍節度使前後三人。皆張姓。曰仲武。曰允仲。曰公素。今乃合二名而曰仲素。及詳其歷官。卽公素也。又其逐簡會。在懿宗咸通十三年。去德宗時甚遠。且又安取此篡奪暴戾之人。而載之名宦乎。今灤州乃祀之名宦祠。吁其辱朝廷之典。而貽千載之笑也已。

考長城

長城不獨北邊也。其在中國亦有之。史記蘇代傳。燕王曰。齊有長城鉅防。足以爲塞。竹書紀年。梁惠王二十年。齊閔王築防以爲長城。後漢志。濟北國盧有長城至東海。大山記云。太山下有長城。緣河經大山一千餘里。至琅邪盡。入海。此齊之長城也。史記蘇秦傳。說魏襄王曰。西有長城之界。後漢志。河南郡有長城。經陽武到密。此魏之長城也。其在北邊者。史記匈奴傳。秦宣太后起兵伐殘義渠。于是秦有隴西北地上郡。築長城以拒胡。此秦之長城也。趙武靈王北破林胡樓煩。築長城。正義曰。括地志云。趙武靈王長城在朔方。徐廣曰。在朔方。自代至陰山。陰山在河南陽山北也。正義曰。括地志云。陰山在朔州絕塞外。突厥界。下至高闕爲塞。徐廣曰。有連山險于長城。其山中斷。兩峯俱峻。俗爲高闕也。而置雲中鴈門代郡。此趙之長城也。燕將秦開襲破東胡。東胡卻千餘里。燕亦築長城。自造陽。章昭曰。地名在上谷。正義曰。按上谷郡今鵠州。至襄平。曰。章昭云。今遼東所里也。置上谷。漁陽。右北平。遼西。遼東郡。以拒胡。此燕之長城也。秦滅六國。而始皇帝使蒙恬將十